

秋澗先生大全文集

六

華化圖書館

Wahwa Library



開化圖書館

Kaishua Library



開化圖書館

Wahua library



開化圖書館

Kaizhua library



秋澗先生大全文集第十九

七言律詩

老境六適并序

夫人生百歲如馳駟過隙能幾七十者又復幾人  
所謂倘來外物猶浮雲過日亦何足道哉因感壯  
年所行多輕生之事趨前太猛一也讀書過分二  
也飲酒無量三也妄慮坐馳四也喜談耗氣五也  
戰藝多勞六也不肖今年已踰六旬念此六失覺  
五十九年之間何翅是耳而驚而愕且畏且怖豈  
勝既哉故養生之念蹶然生于中蓋其勢有不得  
不然者因作老境六詠庶幾與吾同疾者聞之不  
無少有所戒亦老者安之之意也至于直達性情



以救往失初不以工與拙為計也幸觀者無謂至  
元二十四年冬十一月一日秋澗老人謹白

飯飽即步

殘書讀罷午殮餘信步徐行當澤車接武徑過通德  
里談玄時到故人廬老便步穩靴無襪靜愛聲環佩  
有珺相送歸時燈已上到床一枕即華胥

目倦忘書

辛苦雙明六十強滿前花黑理應常酒盃縱對甘無  
分書卷相看任久忘虛室靖深便默坐午窓晴爛怯  
餘光悠悠未了三千牘吟諷從今付窟郎

言慎養氣

聚首閑談足是非到頭豈曉得小人歸屬垣有耳嘗捫



舌守口如緝慎動機珍惜無先吾氣浩坐忘深識道  
心微客來客去俱恬靜克已存誠恐庶幾

食甘戒飽

食前方丈肉如陵莫遣分毫胃氣勝百斛盡從中所  
過微軀能不病相仍已飢便飶甘能止過軟雖鮮熟  
即乘此是老坡真聖樂免教携杖去騰騰

寤寐絕思

夢神依例到殘更日似鰥魚了不瞑正為膽寒增展  
轉不緣身老惜伶俜滌除玄覽歸安靜宰制心君入  
杳冥昨日早興襟韻足不知青鏡鬢星星

息藝休心

辭筆縱橫更老成祗采虛譽不根經風雲滿眼嗟何



有月露盈箱笑未停肆口成章終妄作忘言休思是  
頤齡子淵直在心齋妙一字何嘗及性靈

坐倦即眠

坐暖團蒲倦自然夢歸先到蝶飛邊  
簪癡絕疑盤石肩并斜傾似墮  
香散餘馨栖翠被燭搖寒影掩  
殘編老來境界無多味飢即思  
殮困即眠一作不教

和論性篇中

香吟燈殘靜枕惟竹牕幽思獨依依時情久與詩情  
澹銳氣夜氣歸空控孤膺堅鶻坐漸驚縫掖擁

腰圍

味雖同體未分甘從朽木譏

汲城懷古

尚父祠荒草滿扉伍城猶在陣圍圍飛梁水落橫霜



賴石馬門空半夕暉竹簡有光陵寢破山川是昔  
人非臨風笑煞安釐事甘着虛名博禍機

夢王尚書子勉時罷中丞在揚州丁

分明昨夜夢王褒海上歸來從鳳毛燈下留連醉

筆端揮洒挾風濤滿囊文具為余贈四座春風倦  
士豪與客忽從窻隙去惘然驚覺聽鷄號

冬藏

木葉歸根到閉關遇藏初匪避冬寒孔宣何苦韋三  
絕顏氏胡為樂一簞庭戶信知吾道在光陰移入畫  
圖看此邦雖小無窮事定力先須似石盤

小邑都來掌許間紛紛人事日多端敢言絕學希

不解呼盧去効韓身老轉驚謀道拙時艱難作強



歌歡正須一室虛明地時着閑身引睡看

丁亥歲十月十日夜夢乘船渡一大河既

濟望南岸一閣高數百尺總力北向白簷

至地上下以琉璃大簾垂蔽翠色半天甚

奇麗也

雲間高閣翠為簾疑是仙居擁衛嚴虹影蕩搖青帝

闕海風吹墮寶陀嵐半空倒景驚奇絕千丈搖光入

顧瞻我自平生多異夢似憐方朔詫雄談

筍飲

李縣丞靖伯約嘗新釀坐客有云酒之醇

粹莫胚胎若也遂筍而飲之偶得獨脚句

醉歸為足成之如能可君等雅意便當屬



和時至元丁亥冬十月八日也

瑟縮松風滿  
蕊春蕊頭  
斛飲有餘薰  
醉鄉日月時須  
到太極胚胎  
昔未分肯放  
小槽珠作滴  
快傾浮蟻玉  
為群人間愁  
緒知多少一  
酸能消正要  
君誰擬鯨吞  
壑綠樽一杯  
聊示試芳温  
中含妙理何  
多味細捲春  
江仍帶渾談  
藉清光搖北  
海詩憑風韻  
繞西崑知君  
預報時須意  
免致來敲月  
下門

透月岩

偶到君家思  
適然一峰竒  
石墮五岳前  
千金欲買初  
無價百穴潛  
通小有天花  
露逗香滋碧  
潤月娥含景  
愛幽妍從今  
紫翠芙蓉夢  
不到齊州落  
照邊

成氏西灣即事



栽種西灣趣已成主人置酒約同傾  
小車來駐林間閣藜杖閑看兩后耕  
老圃生涯非細事滄浪清濁任吾纓  
少陵苦愛溪居好興在千章夏木清

南陌東城占却春西灣深處竄藏珍  
青芽破粒柔桑稔紅袖迎門杏蕾新  
醉裏光風多樂事老來清晝是閑人  
就中更愛清溪水隔斷西風庾亮塵

壯年心事幾虧成每對蒼髯聽細傾  
夢裏江湖幾走遍林間雞犬却歸耕  
潘輿正要閑居賦蘭佩誰堪海

縣纓脫却烏紗有忙事公瓦頭春釀漉  
生清海縣纓暗用解蘭縛

塵纓事海縣調周  
夢出為海縣令也

清明日花下獨酌時成子歲北七  
泗溪作

人家拜掃重清明羅綺翻香曉吹輕  
不欲把書成元



坐也隨遊子出重城閑雲弄日何多態春水平橋不礙行勝事自知還獨往一壺未就淺沙傾

後一日雨中招林韓李三君子小酌且為

梨花洗粧一時新植梨花

花滿金罍酒滿樽一盃歡飲得佳賓近年樂事無今歲此際閑身有幾人祿美勝於三品料臘香清徹六根塵風簷數點催粧雨辨與梨花作好春

東坡汲乳泉圖

儋州遷客玉堂仙服食天教得乳泉三巖遽驚滋浩氣一甘無壞是冷淵中朝清議孤忠重瘖海鯨波九死邊落月澹隨人不見滿襟風露獨翛然道宮獨發乳泉香似與坡仙養浩方并列不從炎海



瘴味甘還比上池觴化機軒豁元胎濕孤影追隨月  
色蒼天地此身忠義在一杯三盞濯肝腸

送姬仲實隱士北還

紛紛未術例從諛邂逅淇南論有餘賈傳自怜多感  
慨東門何意泥孤虛兩連賓館留三宿天遣幽懷為  
一抒覺我曾中間未有九峰新說曆家書仇一峰篇

壽器之國醫

學開金櫃得真傳濟物功深不自賢前輩衆推楊獨  
步後來誰與子爭先青黏有術扶衰謝白髮相看度  
歲年此日樽前祝君壽一杯還代上池淵

白簽事彥隆哀辭

素菴一氣本龍佟心苦時違揉與同強仕有懷三品



料發言都是四書功愁隨野草憂春雨恨滿山城對  
學宮誰為魯齋興起地古共門外便秋風

王師中哀辭

玉樹庭階自幼看九霄雲路到鵬搏天門折翼差何  
及宅相論微理未安咄咄向空書恠事涓涓揮浹濕  
門闌應怆遺愛祠前栢恨鎖秋風月影寒

壽少尹寶同知室丁平章子

秀稟金天一氣晶規模全是漢專城當官治劇有餘  
裕臨事知幾見老成門闕起身真相種天池刷羽看  
鵬程一杯領取千秋壽細着檀槽合玉箏

顏氏冠詩寄蒲城主仲白祠李知觀

一握儒冠綴七梁金絲勻織玉為相願瞻遺制從顏



始陪侍先師見色莊巾卷在庭聊束髮玉簪橫影

升堂切雲莫羨如箕大曾冠三千弟子行

紋背簾梁玉色瑳師傅元與薛同科薛漢高帝紀

要盤白髮三千丈閑過春風十二窠衰俗幸存加冠

礼滄浪無用濯纓歌敝餘改作須重巧玉道守先期為

細磋

朱砂餅菊詩并序

秋澗翁觀化於秀春園見菊之種甚多有  
所謂朱砂餅烟脂紅予以白與黃菊之正  
色今变幻若爾何哉或曰接之於艾致然  
予試為之說曰艾火草也菊亦陽種也以  
二物方盛之時使客於艾之末未有不隨



其主之盛氣而變者又赫以鮮者陽之精也故有硃砂之異此雖小事亦氣化之類也格物者不可不知故序

玉餅金蟬爛熳秋朱砂為質更風流天機欲測司花巧物色先從氣類求孕秀似隣勾漏井分香當上絳霄樓朱顏厭對紫桑客恐覩空杯笑不休

送錄事薛彥暉秩滿北上

秦隴風聲化有郤規模况自左山來三年弊邑淹良驥一日銓曹得茂材撫字論功書上考庶能覈實到兼該春風領取新除去喜動門山兩翼開

王尚書子勉挽辭三首

浚洒行間閱尺書計聞三至尚疑虛佳城一闕無開



日聯事三年忝貳車詞筆早推韓愈健曠懷未覺孔  
融踈那知一夢終天別惆悵春風隔綺䟽

少孤綿歷太逆遭甫壯光榮四十年氣運倘來方出  
限愛心先斷便終天魂飛楚些和雲慘淚洒淮壩與  
海連左袒客衣三面去延陵宜為聖稱賢

婉婁英姿自妙年奎光空照玉堂仙辨教一世龍門  
重誰遣三王鼎足偏曠度包荒無微略秋濤翻海失  
鱸鱸百觚未醉螺臺酒重為斯文一泫然

遊蒼峪青岩山有懷烈士甄濟

義重於生視若歸封刀無復騁霜威千年喬木高風  
在一片青岩烈日暉元稹論忠真不愧臬卿推逆與  
幾希環山弋獵猶知畏白鳥衝煙自在飛



商左山副樞承曼念及作詩以咨雅意

四十年間九九遇感公翦拂使長鳴三蒼論法傳餘  
蘊七扎量能綴賤名曉日嶽祠留語別秋風章曲戲  
予行傷心綠野堂前月空遣流光照斗城

賀士常侍御受吏部尚書

識鑒久歸清議裏恩光今著履聲中文章曹植波  
瀾小星斗潮陽譽望隆除重不知黃散目輸誠思補  
燮調功從今不鎖春風部管取銓衡被至公

題懷孟路宋總管太夫人九秩詩卷

七十邦君九十親人間此事少同倫栢舟高節徽彤  
管鸞誥清光照盡輪步履不緣扶杖健精神猶比結  
襜新河陽莫說潘輿樂沁水花時別有春



身寵家溫親老健福全無似宋門榮漢宮傳訓班儀  
在萊子承顏彩袖輕孤節勁於相水竹九齡春動野  
王城年年壽席聞佳語南極星邊婺女明

和陶主簿見寄詩韻時主肥鄉簿

半生鄉國共游居老去文交樂更餘苦厭物情多薄  
相每吟風雅入吾廬一官稍得寬民力三鉢何憂進  
野蔬聞說列人真吏隱竿頭還有再懸魚

哀挽亡交中丞王兄五首

百地墮地一能龍知己相須不易逢僧孺固應知杜  
舍臧洪初不負張公扶搖羽翩翩溟海作養功名上  
景鐘自笑澗松居不巧半生清露到虛蒙  
嚶嚶求友幼同聲五十年來好弟兄零落山丘有今



日笑談樽俎意平生酒壚不隔河山斷陰翦其如骨

最取征臨用韓文公終事寂寞道遥堂後木對床風雨最關情

故人牢落曉星疎此日三王獨在予泉壤冷埋和氏

璧玉牙籤空見鄴侯書問誰久視嗟同盡老失知音慘

自餘從此故祠鍾鼓地謂去歲冬用三獻禮社母夫可于室此礼久廢君首行之良可

嘉尚過庭趨處半靡蕪參議公在時賓客與君相接者未嘗坐正堂上其謹敬如此

衆响漂山不易安勢張那復漲狂瀾一時附會真堪

畏此際支持誠獨難貝錦斐文哀巷伯瑤琴幽憤變

猗蘭一言曾擬桓侯辯醉裏哀箏筆為謝彈

病臻留飯作終天示我新文已惻然竒疾變常纒四

日佳城埋恨便千年囑遺不及私門事燕翼全規誠

子篇惆悵西山埋恨處定應大鳥淚如泉揚後漢

揚後漢



牡丹

洛譜丹青說典刑，盡欄春日見升平。金盤薦品承朝露，翠幄留香護玉鈴。神女賦中羅襪步，少陵詩裏麗人行。百壺莫惜花前醉，樂事從來不易并。

海棠

桃李無光分落英，海棠姿色占春榮。雲鬟綠擁粧初罷，醉臉紅勻睡未醒。任使無香真可意，放教千葉更多情。光風流轉都能幾，莫惜沙頭倒玉瓶。

挽史九万户

半生希古振長纓，隱隱曾中富甲兵。三篋補遺安世博，千金爲壽魯連輕。春風故里鳴珂遠，暮雨山丘宿草生。一傳散仙懷素叙，爲君珍惜比書評。



小園即事

閑來無事欲何營  
揔是栽花種柳情  
汲水漑餘紅藥  
秀澆欄看得綠陰成  
身參化育行當健  
物喜安舒悟  
養生放下虛  
惚時倦  
卧夢驚  
還聽乳鳩聲

小園清潤稍堪觀  
翠有庭筠馥有蘭  
未放蕃花金作  
蕃已開梨菜雪為團  
鳥欣有託扶踈樹  
客喜來憑話  
曲欄深院日長須  
細履也勝愁坐  
兩眉攢

託陶晉卿借鄭氏所藏  
刘房山行草效吳  
軀出入格

房山一字三過筆  
此帖揮洒何其殊  
臨游親覩長史  
作透綃又似涪翁書  
春葩舞女多姿態  
遠韻高風見  
步趨手追心慕情  
正切託君為借  
今何如



復作一詩以繼前韻

鄭家數幅房山書自笑伎癢須臨摹五陵裘馬見年  
少兩漢劔履多文儒游談得叙真可壯破塚求法何  
其愚煩君更擊馮夷鼓未信驪龍不吐珠

戊子歲穀兩日

中丞王兄令李子師中携名酒洛花相餉  
作詩以謝殷厚

洛艷紅嬌醴味佳併携春色照人來豐苞細拆先三  
嗅醪蟻連傾尽數杯北里定應香作陣西園休詠眼  
慵開維摩久病行當問好在春風紫錦臺

括九峯禹貢解北條北境之山

晉北諸山自代來

自襄武風憲

肱凝首自霍山開連



延眷脉為壺口南作析城王屋排復折而西雷首出  
一支北走太行崖次又一支為大茂四條明白不須  
猜

大卿徐先生挽章

諱世隆字威卿金進士  
第陳州西華人官至僕

賢大  
學士

壯歲魏科擢上游如公樂易更風流文章海內元推  
轂議論行間宋與儔鄉校功存東魯盛炬蓮恩在北  
門優自矜狂斐慚提獎爭遣鱣堂一拜休至元廿一  
年予按部  
東平拜公於私第之前堂時公已在  
病眷眷於予者甚歎既而卒于家

壽總尹劉公

一家英氣蓋遼東聞說君侯有父風作牧首分青社  
土策勳誰比黑河功化行屬邑謳歌裏春自慈闈孝



養中今歲壽筵光景好榴花渾似舞裙紅

龍教授哀挽

東郡教授龍君名革字取新廣安人善賦  
學及五星等術士子從之學者多所沾丐  
至元辛巳與予相遇于滑朝夕從游者旬  
日一良德君子也後主魏縣簿政有聲今  
茲云亡其子夔來求挽章特為賦此

當年按部館南衙日夕相過興未涯楚產例佻開寶  
學天星推跳見名家大任山下游龍洞歸鴈亭邊望  
暮沙此日題詩重惆悵為君回首看西華南齊任子

商左山哀辭

商孫膚敏矯猶龍千載流芳見此公佐魯謀猷元克



壯定秦功力更沉雄城門被焚池魚涸臣罪當誅聖  
主聰老淚不緣知己痛麒麟臺上又秋風

夾谷尚書哀挽

名之奇字士常  
吏部尚書

品彙流形萬不同銓量平允俛清通恩非出已知誰  
怨天不遺賢見道窮三復苦辭歸汶上一官催老掩  
曹東茫茫大塊外沉裏重為 清朝惜至公

追挽承旨王文康公

文章四海一康公炯炯元精貫自中盧肇名先金榜  
重歐陽仙去玉堂空道由實學明真用義不忘君見  
至忠惆悵當年門下士斷雲低處尚書東

左丞史公哀辭并序

左丞史公之薨客有云云者余曰事機之



來雖理有難處度不違於義其寵辱有不  
足驚者當克明之無定力以順受輕則伊  
鬱而自沮重則至憂悻而殞越正以不安  
而無旋故也嗚呼史公不少隱忍以光先  
正之業而至於斯其命耶抑以有未安於  
所受之正耶於是作是詩哀之

鬢髮全貂漢九卿大階平自栢臺清俸將事業傳鍾  
不持家声藉父兄自忖行藏無所慙此生榮辱不  
須驚辦姦聽徹唐君說淚洒春風滿身纓

丙戌歲中秋後二日夢過真定與宣慰張  
鵬宰相會作詩為贈既竟頗記首尾意韻  
因足成之

九月十一日忽英甫過衛  
張是月一日此日幸於真定



千里提封入控臨不知秋氣上華簪紫泥頒寵何三  
詔丹宸輸忠見六箴機務固方前日簡論思尤比向  
來深

潭園月轉竟孤懷媿此心

蔓慶憲副良友

十年局促伏轅駒解鞅歸來樂自如奔走止緣餬口  
計支離况是不材樗常因客過知安健多謝人來問  
起居把酒竹軒猶昨日清詩想似向來臞

寄贈介甫憲倅聞除與元摠尹

方聽新除入歷城忽傳改授漢中行霜空暫息塞馬  
飛翻民社教優撫字声伏利試尋山水堰遠征先卹  
異方兵如承高省相垂問老我山田二頃耕

送徐正卿秩滿還漳南



共筆灯牕憶昔時只今相碩贖成絲三年調議良多  
益一道將迎不易持辭別已餘連日惡直清留在後  
人思漳南未是歸棲地要與朝家作羽儀

謝湯宣慰惠書

閑來何物慰窮愁細把調元入校讎相業有方無限  
事室書能幾不容抽已欣惠賜承蘇集復夢翻香上  
郡樓插架万籤容遍覽鄴侯人道是湯侯

代書寄友舊二首

匪爲窮愁日著書閉門經史且相娛爲吟魯酒無多味  
任使陶鉞之見儲黃卷能教吾道在青雲未覓故人  
踈有時夢到烏臺月奄奄猶勝閉婦車

半紙功名不足書暮年心緒若爲娛背昧伎倆輸鳩



拙度歲生涯儉擔儲為寂恐貽高密笑不才爭似孔  
融踈退藏入密真吾事誰遣門多長者車

西村三首和韻

種來佳樹日扶踈秋草當堦不忍鋤城府事皆閑靜  
重林墟秋熟物情舒溪行改運農耕後漁浦移梁水  
退餘我自興來成獨往手拖拄杖不巾車

近歲行藏匪自踈胷中刺鯁要誅鋤通明縱使同方  
進撲鈍何如似魏舒堂上吟馮從肉食橘中游戲喜  
霜餘八騶前馭非吾事正要安安徐下澤車

忖量身在兩垂踈去學淵明荷短鋤時事未容閑裏  
過人心安得老來舒沙鷗遠汎機先識穴鼠深藏壤  
有餘我輩所行多倒置旱資舟楫水資車



寄道之憲使仁兄

匪為場苗賦白駒別來多事復何如臣門最喜心如  
水故第猶知里號樗落落壯為天外客潭潭老向府  
中居為述日二憲使不出司故云使君若問年來况山澤依前老病  
癯

聞平章由公薨於維陽以詩挽之非舊語

邂逅藥江讌語頗外臺初建首先分風雲契厚真吾  
相魚水情深有分民名在諫垣称鯁直力輸

王室最公勤豐碑會見十年後猶是 中朝第一人

丙戌除夜

盤花紅卷燭光搖一歲迢迢盡此宵凍坼臘香浮栢  
葉暖移春意上梅梢拊心自信愚忠在流涕還悲髀



肉消揣分要知温飽力比生無地答清朝

賀文卿同簽宣慰河朔時真定連年旱乾

春風花發四隣香曲巷時過笑語長議論有方消鄙  
薄功名無地不輝光簽書樞府孤忠壯愾敵長江一  
蒿航今日八州歸總轄又煩和氣致時祥

同簽趙公挽辭

諱良弼字輔之遼東人至元二十三年南遊京洛卒明年正月二十四日

夜見於夢狂予令易其名諱絳意甚切不然目將不瞑矣遂追作是詩以紀其意

識遠幾沉任獨勞不將虛譽冠冠時髦使華光動扶桑  
日樞府謀深尚父韜四海樊大川遺隱在九原精爽與  
秋高分明夢裏來相託抵掌猶能似叔敖

禮部尚書許公挽辭

官至祭祿大夫名國禎字進之翼城人

當年翎履上星辰忠謹持心老益振藥籠功名開壽



域朝端風度見誠臣勒漿有味露餘論卿月分光照  
近隣我自訃聞增悵望白雲長處是滹垠  
幽訃初傳不忍聞惜從朝著失忠臣安常每懼非  
常寵格物還深濟物仁貶損定交何眷厚燕閑相過  
更情親鞦韆細約車聲去長憶同遊過闕晨

宋賓客弘道挽辭

景玄絕學到縱橫此老猶能見典刑相府才華推上  
客少微光彩動前星誠身初不離儒行進讀何妨  
雜貝經正有莫教傷餒恨併隨神矧闕泉宿公舊有  
萬有紛華入醉吟都將誠靜粹靈堪雲松卧壑存初  
志堉苑露恩豈本心談並齊諧疑志恠學空滄海  
別穿深斗間縱有龍泉氣淒斷春風綠綺琴



追悼叅政李公仲實詩有序

至元丁亥二月十日夜夢李叅政仲實再拜向予顧指所佩鞶囊曰吾平生盡在於此他日會須累君但不敢輕易發也既寤悵然者久之因追作此詩以見其神交之不昧也昔李衛公見夢於令狐綯懇其北還綯畏其精爽白于帝得以歸葬今李侯明以後事來託予老且閑不知何所賴焉冠劍風雲擁漢庭斗邊喉舌振孤聲漢儲與翼非輕託蜀酒雖多每細傾身後哀榮光謚冊夢中精爽似平生分明拍顧鞶囊事一縷幽光要累卿

挽教官石仲遷

名與義鄭州人少爲縣吏後從李野齋學終南京教官



臨試東過僕射陂封書投贄識君時生猶積玉期三  
獻死愧囊金昧四知塵世驚回黃落夢帝京悲動白  
雲辭因思吾輩豪雄處貧賤能安貴不移

送府判李侯赴調東曹其懷與政備見乎辭  
邛衛交衝辦事難送迎終日不停鞍去官不到瓜期  
代在分能居幕職安衙鼓通嚴披訟牒厨煙炊碧澹  
蔬盤回看奔走風塵際却忠新除是振冠

代書奉寄子明宣慰時為濟南宣慰

五載因官寓鎮陽朋簪盍處佩聲鏘金盤爛醉雲樓  
酒綉屈其物反今之半齊也同披燕寢香樂事有懷終會  
合名泉無計共徜徉空餘情似康崖水一脉勾連到  
海長



壽子初中丞

鼓瑟春風記點同轉頭俱作白頭翁遠遊長得知時  
報微恙行收勿藥功巾卷在庭隨燕几嬰香和露溫  
簾櫳暮年縱有周公夢輸與浮雲度太空

送史邦直之任竹山

縣屬房陵更在西一官雖遠儘施為王風漸被無遐  
邇異俗能安戒鄙夷會待竒姿超駿足試教銛穎發  
囊錐彩旗開簇清江渡想見春風到任時

丙戌歲除夜

去歲椒盤一笑藥今冬除夕倍凄然莫餘靈柩鍾聲  
後坐對陰容燭影前存歿不堪思往事康寧還喜過  
今年數家剩說新春好夢到梅花小雪邊



奴星具糗送窮歸夜久蘭堂燭影低梅雪溢寒嚴厲  
鼓枕香留暖潤盤犀試傾臙醞歆椒頌已覺春風拂  
盡雞明日書雲臺上去蒼精橫角看杓攜

答何劉二端公

屢有人來問起居近年為况果何如每承省錄常深  
感欲話行藏不敢書逐末有慚規什一歸田無力把  
犁鋤時時夢到霜臺月靜聽烏聲尚起予

挽李子陽

早歲龍門接茂材相携有意上台階夜書日稱快元康  
在詩思爭高岳掌開落月滿梁清夢斷旅墳三尺野  
烟埋微官殆似台州鄭村卷題詩擬八哀  
三十年前成邂逅酒壚傾徹醉顏開筆端力挽狂瀾



倒袖裏親携大華來淚洒行間遺草在恨埋泉壤劍  
鋒摧因思秋兩蒼吾句何限令人不飲哀

錢士達御史還臺

通家世契鬱鬱蘭金駝馬南來屢見臨披露義襟餘悃  
幅酌量時務入精深眼中白璧真無價調外朱絃有  
賞音回首炎荒四千里一杯不惜為重斟

秋澗先生大全文集卷第十九



四  
卷  
本

開化圖書館

kaihua library



秋澗先生大全文集卷第二十二

七言律詩

西溪見夢十月初八日夜五鼓初

挂面相看几格間  
笑談似與浣離顏  
越裝已辨宜趨  
往江路雖遙不久還  
魯國自來尊北海  
謝家誰更作  
東山蕭蕭夜雨蓬  
牕曉細酌清樽與涕潛

儀封道中

驛館殘缸曙色分  
馬馱殘夢走跋跋  
去家已遠誰為  
侶到處相逢有故人  
健羨鷗盤慚始擊  
靜便蠖蟄返  
求伸一杯拜酌睢陽廟  
激懦扶衰尚有神

睢州道中寄友人

奉詔東行獲所安  
却憐衰朽強為顏  
恩緣至溼



酬無地事不預防多後艱遠馭有方清百越織埃何  
補奠三山殘年正要相料理既不容辭望早還

過歸德寄何相

白髮年前六十三強扶衰朽去江南心知義重吾何  
惜老不身安事恐耽弩末縱能穿魯縞病軀胡可敵  
闡嵐鄉關回首四千里正賴君侯與細參

十月廿七日過下邑喜與趙彥伯侍郎相

遇作詩而別

暮色增寒慘驛亭燈垂紅燼盡情明長年幾夢溪堂  
月此夜相看下邑城流落蠻方真可畏笑談樽酒且  
同傾回頭楚水楓林下焔焔聲華定彥卿

宿宋家山趙氏田舍



白髮搔來不滿簪  
就中誰遣世塵深  
野煙遙認圯橋  
月霜夜初聞楚  
力砧長路苦吟  
支睡思客牕無  
夢耿  
鄉心前行說似  
安夷道隱隱青  
山轉榭林

揚州送劉漢卿東歸汴梁

海鷲翻雲下錦鞬  
眼中人物見風流  
誰期淇水三秋  
別却作維揚數日  
留樽俎留連江上  
月風煙吟眺竹  
西樓馬頭細爵梅  
花句又領春風入  
汴州

西湖

西湖三面簇青山  
淨拭菱花照翠鬟  
蒼海月寒龍穴  
露秋雲仙去鳳  
簫閑無多樓觀  
猶圖畫最好風  
煙近  
市闌鄭重綉衣  
周漕使畫船春  
酒待余還

留別

左轄台相



兩浙江山漠霧雲吳儂輕剽到羣奔繞寬防異漢威  
霽稍困隨方以德存 龍寵優來心愈小義方嘉如

勢忘尊忠傳孝繼平生事長見風煙擁戟門賢一作薦

台衡職排李何頊在一門

已丑冬仲三日與宣慰楊子秀摠管高瑞

卿侍郎榮甫三君子邂逅於餘杭其喜有

不勝者以詩留別情見乎辭

北來冠蓋拂吳雲試計分飛動十春意外論交緣義  
重天涯相值更情親放懷罇酒難同舊照眼梅花摠  
可人明日浙江江上去寄聲多逐荔支塵

下大安嶺俗云分水嶺

宿霧羸山苦未收馬衝寒雨下關頭紅雲軟脚揮三



爵碧玉攢峰湧萬丘日月麗天從北轉山川分水盡  
南流漢家聲教今無外誰遣氛妖孛斗牛時冠汀漳州  
珠平故

三山元日

臺蕪天香簇絳紗三山簫鼓樂年華竹枝歌後多淫  
祀燕子歸來識故家荷鬢開粧餘翠貝蔬盤勻釘雜  
魚鰕殊方風物雖堪賞爭遣衰年客海涯

贈之問泉尹福州庚寅三月廿一日作

社燕秋鴻十載餘天涯邂逅兩臞儒九遷論秩心何  
有百折當機氣自如喬木故都思往事月明滄海炯  
遺珠春風回首桐城郡時訊平安見簡書一作小書

送李司鄉輔之北還名天祐安次人同年



憲府乘驄憶舊遊白頭相見嶺南州地連瘴海三山  
月人在元龍百尺樓此日又驚鷲成契闊異方誰與慰  
淹留交親若問衰年况夜夜秋瓜夢故丘

庚寅春三月與張叅政猷子李司卿輔之

會飲九仙絕頂嶺道室嶺曰

四千里外同羈旅三十年來老弟兄樽俎喜陪今日  
宴江山難得晚來晴巖花帶露春容濕醉袖翻香笑  
語清莫對雲霞說輕舉蒼生料理正煩卿昔張叅政奉

州民數

暇日登道山亭懷古亭在烏石山巔有碑  
刻南豐記文其上刻鄰霄臺三大字



閩會東南控嶺溪斗牛無字歲無饑文風興盛猶唐  
館霸氣沉雄入劔池海近重城朝日蚤山蟠平野暮  
江遲危亭一片瑶鑄在晤語殘陽倚杖時

送師茂真蘭寶臣二御史

庚寅四月十九日

半歲相倍百越東採時人道嚮來驄劔華光動蛟螭  
匣豸角霜嚴簿領叢明月共看千里隔芳峯迴憶一  
樽同借來不得成借徃日斷三山羨去鴻

大中德長老見贈竹輿作詩為謝

人老筋骸不自持乘堅策駿兩非宜憐師雅意慙勤  
甚惠我班輿結束奇花底徐行閑看處陌頭趨進早  
衙時醉歸更比籃舁穩一任山公倒接籬

贈鼓山長老平楚



不下禪床四十年老軒頭角出冷淵  
只從貝葉傳心印來與雲山結靜緣  
蘭馥蕙光憎嫉媚竹風松月共清圓  
荔舟有約重登覽轉首天風恐颭然  
總句有盡蘭云

庚寅夏四月送

二御史回淮安道中即事語知己者

五千里外一衰翁八郡規為與省同衆口鑠金方作異諸生鳴鼓欲誰攻  
寒封老栢常年慘暖借繁葩盡日紅  
夢到垂虹亭下水雲帆千尺掛秋風

遊鼓山五首并序

鼓山在閩中為特秀余到官五月

王事鞅掌未遑登覽以盡江山之勝迨明年  
庚寅四月庚辰遂與天平 叅政獻子大都



李郎中德昌御史聊城師彥貞居延藺寶臣  
提刑東原曹仲明憲幘張遂良程焜臣何舜  
卿來游尋前盟也辰刻抵戒院舍鞍有輿迤  
邐而進至望州亭主僧平楚來迓用軟脚例  
酒數行歷松關由石門入白雲寺適筭省樂  
公亦供佛來此乃相與禮像殿浴佛於西  
寮既而飯巖峯丈室眺上方重閣降觀湧泉  
步入靈源洞度喝水巖登天風海濤亭觴詠  
間獻子德昌扶携上征徑欲造大頂峯足觀  
紫陽遺刻石巖雲荒中途而返時宿雨濯山  
林壑爭秀煙霏空翠有顧揖不暇者莫不欣  
然志歸冲冲若有所得僉曰樂哉今日之遊



也吾儕越在絕域縱使重來恐無復此歡耳  
至元歲月不可以不紀詩亦不當無也明日  
採囊得唐律五詩俾刻諸亭上以爲山中故  
事

峰迴路轉已層雲望遠風煙接海門宿靄去收千嶂  
雨老僧迎勸半山罇巖幽選勝窮詩境山迥登危黯  
客魂闊絕殊方同大塊坡仙心事強爲論

筍輿同駕躡鰲臙冷帶秋聲入白雲雪竇有禪容暫  
叩名山無分與平分雲憐嶺斷聯松蔭雨惜題芳護  
蘚雲會約贊公重借榻鼓音同向夜深聞

上方游遍雨花天洞壑尋幽得壯觀林影蕩空金界  
闊天風吹袂海濤寒江山若爾不一醉杖屨再來無



此歡詩在眼前拈不出碧瀾秋色上層巒  
杖藜尋壑游初遍倚檻冥搜興未闌濁酒一杯方大  
嚼蒼煙千頃要竒觀放教眼界寬無際徑上山椒不  
作難若欲攀蘿窮絕頂海濤風勁不勝寒  
復嶺重岡奠七閩鼓山東峙最崇尊嶼亭詩好風濤  
湧靈洞龍移窻宅存千尺翠屏宜晚對一泓滄海儘  
雄吞雲煙裊載歸時晚月偃松梢玉一痕

道山亭燕集

霜簡無華鷲鳥朋追隨飛蓋上高亭霏霏空翠沾衣  
濕浩浩雄風拉瑟聲已愧東山空雅志枉教南斗避  
女星憂來猛把攔干拍轉覺時情未易評

酬余招討見贈詩韻



秀孕江山氣自靈余君襟度玉亭亭高軒過訪承佳  
什世事開談見遠經秋色望空喬木國海商爭避客  
槎星又聞占籍多陰積一少從良近百丁

送魏參政赴邵武時與江西三省會合破

賊

畫省分麾出越營跳梁黠鼠已替驚環郊多壘真吾  
責報國丹衷在此行獸困可擒須急縛民安無畏  
是佳兵遙知帳繞生犀地草木風前摠戰聲一作捷

省即李應中見示所藏書畫因題其後

畫省官書不片閑撥忙能結澹中緣吟餘紅藥堦前  
露夢到蒼江月下船鑒定正煩君具眼收藏還擬世  
珍傳古人已矣精華在時復橫披一灑然



八月八日雨中書懷

自到閩中十月餘老懷未省兩眉舒命緣限蹇行多  
拙心與時違意轉踈夜枕有蝨妨睡思秋空無鴈繫  
鄉書桂香簾幙中秋近愁對清輝憶故廬

小樓秋望 其下即福之西湖

芙蓉吹老白蘋風隰有游龍草有蛩湖水已翻寒日  
影火雲猶作夏時峰清時還負無能責老境其如所  
事慵推放小窻閑寓目秋來無物不愁容曠旒多一作

增心善人到  
高年所事慵

寄紫山憲使

去冬相從入臺叅君任平江我更南不惜殘年趨海  
嶠擬將風義壓煙嵐得時可進成虛步縱說知難到



強談歸見紫山如有問此身於世百無堪景聯一作碧雲暮合

人愁多千聖白滿簪髮

### 秋雨

秋暑燔空勢莫禁西風吹起傳巖霖驅雲湧海連三日潤物回枯抵萬金火傘炎收閩嶠瘴煙螺重拭越山岑霏霏未洗戈船甲愁絕孤臣一寸心

御史陳君濟來知紫山病告已滿浩然

北歸余以微官自絆留滯閩中未卜歸期

定在何日慨然感而賦此

南來同仕君先往自絆微官固可憐書考已甘陽子下着鞭又為祖生先碧雲暮合人千里白髮愁攻雪滿顛去去吳江西下路姑蘇臺上月空圓



寄參政何公

黃閣年來相業多忠腸輸馮略無佗物情雖異歸包  
總鼎味能甘賴熒和客子遠聞欣欲舞海風何慮偶  
揚波起時草竊逢蠱殘年喜見升平事歸老田間儘浩歌

寄左丞馬公

黃閣清風相業多漢家機務到賡歌默涵羣動歸包  
總力贊孤卿罄燮和春草閑嘶沙塞馬秋霖行洗越  
船戈古今多少調元樣丙魏聲華未減何

即事

耳聵瞳昏久病翁暮年游宦又閩中一旬好快無三  
日百計隨人到五窮每署細銜慚已曠雖無私過亦  
何功揣量薄分宜歸去免着通人笑未通



卧病中即事

萬慮消磨只一身，一身猶為病遭屯。  
老殘食纔助脾神，喜濕熱還攻眼力。  
昏蔬飯半盂，嗟強食物情千變苦。  
難論前期七十，都能幾更有何心到競奔。

即事

地僻天荒自一方，江山環瑣瘴烟鄉。  
炎涼失節人多病，勁躁難馴俗返常。  
媚竈王孫方怙勢，背時郭老怎當場。  
欲行莫克行，還阻乞取閑身且六藏。

芙蓉

平生不識翠苞纖，真色還欣到尔瞻。  
嬌綻柔芳無兩樣，開裝橙葉更多尖。  
一溪野水明粧鏡，滿樹清香拂繡簾。  
開謝已甘秋色晚，碧桃紅杏我何嫌。



卧病吟

四大尋思孰主張  
百般調護不康強  
火頭字尾方為祟  
肝氣脾神互見傷  
秋月攔干吟袖冷  
曉烟庭戶藥鐺香  
夜來一笑伸眉喜  
夢裏分明到故鄉

閩中即事

誰作新詩採衆謠  
八州淵藪萃逋逃  
蒼烟滿樹驚烏梟  
嘯白日四山聞虎號  
取辦急徵農最苦  
仰空哀懇彼何高  
內奸不止終多寇  
鬪敵徒教殺爾曹

為官軍民義

八月十八日野奠回入西湖開化寺

廩祿已沾三品料  
浩然歸志苦遲遲  
宦情老去無多味  
花樣看來總背時  
林下宜尋歌鳳侶  
澗阿閑詠考槃詩  
免教方寸為形役  
惆悵終年抱獨悲



送趙提舉仲遠職滿還江西

眼中薄俗日紛紛信厚如麟見趙君學館久淹雖散  
秩士林輝映總多文三年提調無遺育回首歸飛隔  
暮雲忠孝堂前秋色好淡煙吹滿泮池芹

即事

人微職峻作提刑正似禪僧放海青癡坐久為山鳥  
怪急歸已媿草堂靈雍在邊吏部方酣飲澤畔靈均謾  
獨醒樂得便行無室襪雲間高躡鳳凰翎

悠悠心事欲誰同甚是留侯智與功幸有釣舟截夜  
壑免教官事縛微躬旬多病假慚虛位獄有繁冤謾  
熱中穩送布帆無恙去小樓昨夜有東風謂諸君津  
西風吹老一川秋劍水東南送客舟寒鴈遠賓方漸



陸野鳧群聚正乘流飛鳴聊欲伸吾志飲啄非徒為  
食謀通塞既知皆素定平泉何為志窮愁

題建寧府建安堂壁

郡名改自炎興後官寺多從五代年草木不知黃落  
候江山渾是寶嚴天風時兩若回天漏味厚泉甘覺  
氣全城府自來多險隘高蹤誰躡漢梅仙謂東山梅  
福嘗隱於此

子孺腹疾良愈謝全王二醫官全名立夫  
王名貴和

喜向醫林得二髦河魚為祟免憂勞調和臟氣事為  
切護養丹元論更高曾未決旬收勿藥併軀二豎不  
容逃難忘最是真誠意答荷千金恐一毫



活庵方伎若為高濟物心均不伐勞子孺病來方作  
崇脉源看處弱於毛臨機制變元多筭勿藥收功大  
可褒自是理明窮隱粵不緣潛授老龍韜韜非大韜之  
孫思邈見龍  
所授之法也

贈三衢儒醫徐登孫升伯

徐卿奕世傳醫學道濟衢人蔚有功方自千金開壽  
域眩非三折見良工經橫烏凡筠籬靜門掩朝暉藥  
竈紅我似病梨無可賦略煩料理少陵駉

又題石橋山

龜阜煙霞小有天半空奇絕石橋山蒼龍背倚雲千  
疊寶月光涵玉半環當局仙人閑遣興爛柯樵子不  
知還一樽醉上山翁馬却逐流紅到世間



繼李昌道見贈詩韻以寄

當年初識歷亭仙青眼相看意愜然把臂喜談天下  
事洗心如聽玉琴絃時文變古多君推遠馭長驅並  
我先北渚風煙儘瀟洒興來詩思想無邊

遐觀亭南劍州摠尹張戾所構

閩右江山第一州危欄高倚九峰頭大書快靚凌雲  
榜神化空驚躍劍舟冠蓋送迎無少暇風煙吟眺暫  
相酌曉涼多趁善薇露醉墨淋漓想未休

九日南劍道中龜山山長林元甲和韻有  
云万里好風南去鴈兩溪

明月一  
歸舟

颺香弓刀入劍州登臨高出碧山頭松風度嶺吹紗  
帽煙水漫溪送客舟萬里故鄉今得往一年佳節儘



為醜滿樽淥湛茶洋酒空對黃花一笑休

憫雨呈幹臣詩友

四月十一日作  
時閩境祈雨

天人消息兩交通和自羣情雨意濃一旱沆今幾五  
月四民作苦寂三農雷燒赤尾空飛電雲捲黃頭又  
變風傳語龍棚棚下客孚誠終始要相同  
嗷嗷羣動日焦枯何處癡龍睡未蘇穀未見苗穰可  
望麥方含實勒來無九關變豹無餘蘊百郡承風恐  
失圖試手天瓢儻微恻斯民斯苦果何辜

和錢神詠

幹臣二首

解毅開難到處行雖云銅臭最關情世緣利益稱泉  
貨時便流行托措生武子矜豪編竟埒魯褒貽笑愛  
如兄細思最是通神處買盡人間事不平



鉅室權門坦蕩行反於窮薄略無情散飛庭樹來無  
迹汚濁羣心到處生取象有天還有地縱貪無父亦  
無兄存心思革交征弊何處銅山剷可平

芭蕉扇

輕箒如蕉一樣新  
楮衣筠骨製來勻  
隔牕雨落驚真  
葉灑面風清來故人  
嘗羨楚材為晉用  
却嫌紈素化緇塵  
會當柄在調元手  
與播南薰解愠民

近讀夜來不寐等作覺清而頗寒吾恐傷  
中和而病吾子也因復繼前韻假辭而薰  
炙之亦晁補之擬騷之遺意也幸

笑覽

燭影紅搖夜色侵  
香添菱葉鬱重衾  
鳳琶調軟歌能  
合竹葉盃深醉易沉  
綠鬢追歡燕市樂  
翠幘歸夢越



江吟平明刺買扶頭酒不向諸兒計索金  
夕坐虛窓夜氣侵欲眠還未擁孤衾書因倦讀從燈  
暗物不攪懷任思沉肥遁世高雷子節清貧時見曲  
山吟舊游相望成三老既老能閑抵萬金

和曲山不見菜詩韻

鼎餽藜杯一粢平見君曾次匪鉗罍屢聞飯糗同餼  
舜似要戾封號頡羹靈府天和流玉薤露盤詩思靈  
金莖腹腴踏脆皆吾欲二者難兼恐物情

貧富因君嘆不平食前方丈對羸罍一簞雖具黃糧  
飯滿豆長空碧澗羹糲料不聞波底語秋光時見續  
問壘細思清苦多吾輩愈見蒼蒼責備情

和幹臣詩麓韻



倦懷欲罷不能回，啾唧嚶雜嘆欵清。禁事嚴微服，  
入華山峰好倒看。來禁持作禁，非無謂狂斐。緣渠不  
解裁，鳥瘦郊寒遺像在。至今追想日悠哉。  
詩家何苦似魔為，遠紹傍搜沒了期。鼓舞有舒還有  
恹，禁持似醉復如癡。鼎邊苦思多窮夜，江上冤魂獨  
語時。伴老此生成底事，乾坤清氣幾人知。

睡魔和韻

醺然一氣熱相纏，不是晡時即午前。跪枕丸無所  
濟，昏明心境陡相懸。見侵多自群疑後，澄治無如一  
敬先。不羨老歐能善變化，為鸚鵡舞翩翩。  
欠呵舒挽速如神，不是愁縈即思焚。釀就黑甜濃有  
味，撓昏靈府黯無聞。魂遊纏老三峰客，茗戰推空七



碗勲經事不為渠所泥邊韶便腹見多文

和幹臣齒痛詩韻

硬齧豪餐養老饕先生編具若為牢執流支脉知來  
漸痛拔孤根訝許高縱使舌存宜晦默更堪心苦恣  
焦勞休休事事從輕減急手先須止濁醪

折齒吟自慰

朝來齒折五神驚勢若山為朽壤傾缺豁醜於韓子  
態嘯歌妨盡幻輿情病根何益華池漱五色空傳幻  
術生駢潔浮危雖自取世間何物不虧盈

適見摠府應

詔薦章偶得一詩庶明鄙意呈幹臣

齒牙缺豁雪蒙頭更有何心接俊游一自



詔條頒雨露盡催遺逸起林丘  
韞藏積玉知無限刻畫無益最可羞  
經濟斯時公等在此身天地一虛舟

寄胡紫山提刑

蒼顏白髮兩衰翁前歲將翔馬首東  
常喜笑談猶不淺靜思行止略相同  
閭門凍鎖連江兩瘴海炎吹發屋風  
兩地生還幸無事更何心到炬蓮紅

寄六祖真人

涉世筋骸百不堪只堪打坐老書龕  
眵難遠矚目全眊聽不能聰耳謬耽  
臂痛帶來梅嶺濕心煩漸染瘴江炎  
客來問訊承佳意蓄縮其如向老蚕

五月八日同幹臣遊取家池上

跼促城居鶴繫籠  
祿荷池上暫從容  
花明淡澹池光



外詩在扶踈樹影中老厭宦游追俊彦天教閑處着  
踈慵日斜尚約遲遲去散坐高槐洒晚風

和幹臣山居

細想山居有足論既便嘉靖不知貧霜封幽谷收朋  
栗水漲前溪送束薪茂樹坐移隨所適良苗耘罷見  
懷新隱居不見求高意千古淵明最可人景聯一作樽酒相勞

鄰曲厚樹林交蔭鳥聲新

山中有樂試為論石上無禾未是貧溪隔圃田多滯

穗霜催林葉自添薪醉談有味漁樵熟野飯加餐筍

蕨新大朴散來非復古隱居永志果何人一作半道

蕨藟林孤吟樽湛芳醪蠟夜話爐煨紫辛新遠壠秋露  
葉新朝吟樽湛芳醪蠟夜話爐煨紫辛新遠壠秋露  
多帶總中林霜後半柔斷時耕  
白水親秋細日研青山自負薪



隱仕初終絕異論淵明憂道不憂貧比如違已心交  
病何似行歌自負薪意外風波平地險山間煙景四  
特新此生只向黃塵老笑煞義皇向上人

和幹臣以目疾詩相傲

老來襟袍百無圖遮眼唯便幾葉書不尔心神渾散  
湯豈知目力陡乖踈晚年愈種玄花盛平日豪吞綠  
醕餘氣習屏除元易事急須顛倒坎離居

常倚精神壯未殊有時豪飲痛觀書形骸未化無非  
苦寢餽其間敢自如赤貫瞳人昏若蔽濕留脊并吟  
難除人憑手眼今如此更有何心望玉除

時往往傳  
余有翰苑

之命  
故去

掃晴婦



今年夏六月初方雨凡六日不止前去秋  
節止廿三日亟晴秋種生發能有幾日又  
該云秋后一十八日百粒不結已種者為  
雨所拍艱於出壟方種者曠土粘濕不易  
耨作兒子輩戲作掃晴婦懸之前簷明日  
開霽因作是詩以見其意云

澹粧烏髻綠衣衫一線高懸舞畫簷笑着茗枝揮素  
手盡驅雲影入蒼巖掃晴既出兒曹戲指日何殊艾  
子談百穀近秋苗未立義和先斂壠頭粘

江山萬里圖

勝覽何人作此圖雄誇天險亦區區經營意匠羣工  
上慘澹風煙百戰餘並轡相夷嗤宋魏舞干來遠羨



唐虞只今一統無南北正要懷柔謹厥初漢一作辨指類

聚追奔秦鹿此山虞

江山列地出新圖限隔東南見奧區與校廟謨雖有  
間細看邊備到無餘忌功去介甘捐蜀併力亡金笑  
假虞千古美芹高議在不應成敗論終初

喪馬和幹臣韻

大夫而後不徒行為罄囊金市此乘耳削秋筠分額  
髮臆團孤月映鈎膺長鳴尚憶看雲立論力空懷以  
德稱得失塞翁深領會天教閑坐看飛騰

過郭璞墓

墓在金山西北大江中流亂石間有叢薄  
鴉鵲棲集望之如蒼雪者蓋鳥矢也

青囊書秘造精深葬法人傳冠古今一死祗緣撩虎



尾孤墳何故葬江心師從鬼谷宜多恠山湧平濤壽不  
寸侵世傳紅雖大我特回舟酹公去翻翻寒鵲落蒼  
岑一作舟過亂灘無所  
見寒鴉蒼雪滿埒歎

佛狸祠在瓜洲城

江山照眼舒清眺千古興亡隨眼前瓜步市長連野  
戍佛狸祠古慘荒煙拖樓看取平吳日父老空傳飲  
馬年此日不須開濁浪好風都屬徃來舡

即事三詩奉呈幹臣明府詩友辛卯六月初六日

鯨殛苗夷併放驩九官相讓濟時艱問闕有喜科差  
少煙火全踈傳舍閑雨澤潤寬無遠邇

詔條恩溥到惇鯨

聖皇撫御超前古慶曆元和未易攀



恩書一札變虞驩盡革前非免後艱星影不搖天宇  
靜邊庭無事羽書閑震霆推惡無留拊霖雨思賢到  
有鰥若把古先相比擬周成唐憲敢躋攀占法云民

搖動

巖廊吁咈處工驩萬死猶難謝世艱向奉御禿列死

其層今相哥自請死同亮列為念民若深碩畏

自裁書詔盡防閑求賢不啻飢和渴發政常先寡與

鰥蟣虱小臣雖片善一時鱗翼盡期攀今歲胎九兩

降裁 詔條皆出自

韓齋小集呈幹臣詩友 辛卯十月十日

十日秋霖不出門偶同藜杖步城根故人雅有平生  
好尊酒時陪一笑溫野菊翻香恰晚節露茵團蓋任



朝暾暮歸欲乞天孫巧却歎儀曹是妾論

送同仁甫之任武陟

寬則民輕猛則殘化行州縣固應難紀綱綜務見常  
操臺閣推勞不素餐能使弦歌千室樂何憂風雪一  
家寒來辭請益吾何有一札 恩書與細看

秋澗先生大全文集卷二十

開化



秋澗先生大全文集卷第二十一

七言律詩

溪田晚歸

百物秋成次第芳，野人籬落散幽光。  
晚禾結秀爭垂露，高樹吟秋未有霜。  
瓢飲空思樽湛綠，盤餐新喜黍炊黃。  
歸時更得茆簷美，下澤車輕背夕陽。

辛卯重九嘲幹臣周宰

九日寒花不見芳，西灣招飲忒相妨。  
驅車共載差元約，冒雨長行有底忙。  
野吹掀翻緇布帽，冷香滂盡紫萸囊。  
渣泥踏水歸時晚，也道龍山會一場。

壽李夫人時九十四歲

帝悅風流見二南，洞天真侶記鸞驂。  
慈顏媛媿丹浮



頰素髮飄瀟雪滿簪九十平頭添二二百齡餘慶欠  
三三今年更覺秋容好薦壽寒花滿菊潭

寄竹林劉隱君文甫兼簡苦齋詩老

蓬萊清淺到楊塵林下幽蘭有異芬萬壑烟霏分野  
色一庵閑地占溪雲鸞音時接公和款樵隱休驚豹  
峪君儘著青山映華髮東州人事日紛紛

周曲山挽章 壬辰三月十五日

四十年来老弟兄忍看埋玉入佳城子輿正斃酬初  
志東野詩鳴豈本情六任在官無少玷一貧到骨有  
餘清易車令辦棺衾事猶恐臨行累交生

哀馬希驥

人壽幾何鬼伯催抱羸赴官吁可哀乃知生死有定



象挽斷衣衫喚不迴千室望空絃  
樂一枝風折桂  
林材儀牀最是傷心目愁拂  
春  
劍字埃

競渡詩并引

予前年客福唐寓舍在西湖上閩俗自四  
月中為龍船戲船鑿長木為槽首尾鱗鱗  
皆作龍形以五彩粧繪  
其腹取其澤  
也上坐五六十人一人一棹柱面對翻並進  
如箭鏜歌鼓吹自明竟夕殊喧譁也大率  
爭取頭標以為劇戲踰重午乃已壬辰粧  
賓節追念往事偶為賦此且記越俗之好  
尚焉又平時花竹亭館四面環合不戒臨  
安故亦以西湖名之



五月沅江競渡頻遺風此日見東閩大夫淪溺甘魚  
腹舟子招呼問水濱鏡鼓轟翻蛟鰐室繁華淒斷綺  
羅塵曲終人散青山暮招屈祠前獨愴神

獨頭木香

塔吉甫索賦

水晶簾外日初長一架醪醖雪覆墻艷冷不爭春事  
晚香繁還愛獨頭芳看來玉蘂唐昌供幻出天真號  
國粧壺酒風流名字在醉魂千丈助詩狂

元夕

斗轉春城送臘寒暖回阡陌紫生煙春風两市華燈  
開夜色千門璧月圓書卷光陰清議裏梅花消息  
吟邊厭厭醉裏南樓角無復情悰似少年

和曲山見贈之什



竹林舊文今無幾白髮歸來對曲山詩似春雲  
態倦如飛鳥共知還淵明高吳義皇上葛亮  
呂間鍾鼎山林兩無濟塵埃空負半生閑

和紫山見寄四詩 正月二日作

百險歸來万里江傍人剛羨老能強閑居苦笑

拙遠宦空成採火忙少日搶揚猶雀躍只今苦宿

龜藏絕然却掃閑門坐過簡還疑近子桑 一作

晉公鐵面耻將迎天遣汾亭醉六經麟出近郊休

拭鳳巢阿閣要儀刑菌推露影從團蓋草腐墻根任

化螢天賦美材終大用不然編簡為誰青 一作大器晚

山立揚休見老成輜車風彩動蠻荆兩鄉相望三年

別四海論交六日兄諸葛奇才如汝滯 漢庭公議



欲誰明只將健笔凌雲句亦是詩壇不朽名望君重

惜一領寧  
堪以酒名

七十人生所事休莫將閑惱蹙眉頭看来世運恢恢  
網刺却孤懷悄悄憂肉食廟堂均一飽笑談尊俎更  
何求樂章聽徹醒還醉夢繞黃爐憶舊游

立春日五詩正月初九日枕上作

今年春晚暖何遙庭院輕陰鎖寂寒香散南衙牛已  
碎冰封北岸凍微消老逢月閨憐多日前去灯宵不  
五朝居士病來花不染閉門詩思苦相撩

妾心風旆莫搖搖且着清樽永此朝詩句得吟如有  
助生涯無幾強顏料平生肉食聊尔耳此日蔬盤更  
寂寒休笑少陵垂白老還家曾散紫宸朝是年元日  
立春予時



為待制同百官  
望拜內廷西北

曲山一病保無他卧老行厨閱歲華貧富較來元有

分鄉閑歸到却無家粥盂得味憑藿美詩陣無前聽

鼓搗早晚黃紬紬被底醉頭舒出使排衙暗用文路  
公宰翼城

詩意

輕喪錦帶佩吳鉤曾作江湖萬里遊彩仗春烟縈越

省為韻中年擊梅花詩興醉楊州在家貧好誰餬口万

事癡如慮破頭收取琴書林下去蓋頭茆把要先謀

為子孺欲起  
祿稼軒故云

立春節物最風流釵燕疏盤閱獸酬暖律潛回交泰

瑋香塵飛散送寒牛令龜有喜迎新歲任運何心接

俊游鬱鬱林梢看紫氣悠悠吾道付滄州是日卜得泰  
卦故云令龜



有喜

守歲夜

靈案回飈闔戶樞赤囊懸井漬屠蘇罇留臘味為春  
酒門插新桃換舊符歲事守來人潦倒窮船推去鬼  
擲揄明朝最是新年喜寬大書來聽杖扶領聯一作  
槽塗竈戶

酬司命火結  
儀神打夜胡

元日

朔夜兒童問寢餘莫催予起動長吁圖書万国朝元  
會鍾鼓千門走畱夫璿象謾回齊政斗赤靈何有碎  
邪符沉沉未覩三陽泰愁絕灰心一寸蘆

和曲山詩韻寄紫山年兄

宦業初無一事成誰云祿足代吾耕最忡獨學無



友擬托隣君度此生天外鳳凰得山間風月

相迎詩來健羨凌雲句轉使孤懷不暢情

百計謀生百不成薄田無幾不任耕洗心大易常

絕拊髀劉郎肉不生勢有大行虧倚伏人無定志

將迎果哉去作山林計却恐吾儕訝不情

壯年力學老無成白髮何堪事筆耕張子田園歸有

賦老龐話語到無生一作已分歸田慕張子有時結鞶待王生挈雲心事

翰年少拭目時和喜迓迎有客過門聞

詔語一言或補不無情

人日有懷紫山年兄効少陵清明詩格

前年人日客殊方此日相望各故鄉酒醖不虧工部

口梅華空斷蜀州腸休驚老態連眉白又喜春風上



柳黃君豈笑談稱曠達我非用捨定行藏風雲北海  
捫虱花木西城夢對牀晚節得同林下飲不妨閑  
處看人忙紫山別業在府城西郭多植錦柳課僮奴  
以栢園為事故以柳黃為言

和曲山見贈高韵

我愛周兄不倚中平生臨事見豪雄從傍誰掣挈雲  
手妙用都歸製錦工勿藥病懷須止酒運斤詩筆自  
成風浩然一點宵中氣莫問時污與道隆

肉豉

肉豉傳方出異庖玉盆疑就破昆刀縱橫碎清甃能  
錦瑩潔光翻琥珀膏暖入錫華防性爽味芳禁商想  
京塵年高饜飫便天美不負吾坡養老饕

人日贈曲山周宰



近書雲物見豐年寬大書頒兩日前為穀未知明日  
事得官休羨小兒權翦花作勝徒為爾覓紙題詩一  
粲然遺愛祠前周老子幾時扶杖過思淵

客廡舊名先大夫所扁

為靳嘉議壽

時年八十有三

人生享福壽為先不似君家樂事全春色不隨喬木  
老眉毫光動百齡前風雲藥籠多陰積蘭玉堦庭點  
翠妍九老圖中休着眼世間元有地行仙

琉璃肺

擊鮮為具樂朋簪辣品流馨漲綠沉犀著喜辛忘海  
味霜刀爭割快牛心四筵談屑霏餘烈一縷冰漿濯  
襟勝過屠門矜大嚼夢雲飛遠蹠林深

一作陰  
蹠音帶

簡寄



魏叅政兼謝白紵之貺

草木先聲漢嫖姚一軍畬洞掃地妖碧雲望杏江南  
道白紵情深鄭國僑水閣燕閑時有待銀坑心計苦  
相撩看看銅柱南邊月又見弓旌萬里招

樂全老人詩

樂全老子見輕安杖屨西城日往還論福有孫應有  
子閑居非水亦非山春風滿意花遮眼曉鏡浮光酒  
暈顏九老有圖宜健美一生班列素侯間

耳聾自感

人生五十未全老天遣吾聰用晦明怪志虛傳三耳  
異省心先得一根清腦鳴日作蜩蟬噪霆迅時無七  
聖驚物壯而衰自然理家翁稱譽轉尊榮

諺云不



過顯軒先生林墓

正月十三日與陶晉卿送客回同拜墓

予二人為愴然者久之故有是作庶見夫

當哀切禱之意云

詩後七日其孫以脾疾亡

整冠趨拜栢林煙事往懷賢一慨然羽翼有圖期四

皓風雲埋恨便千年斯文未欲吾儕喪乳釋宜為造

物憐宿草黃岡重回首大書猶是廣平阡

公母夫人封廣平郡

君三字蓋公親筆

良霄散步詩 并序

至元廿八年冬十一月十四日同曲山小

酌林兄北軒既醺相與至瓊溪家夜話歸

見月色煙霏殊有春意因念數日寒沍今



夕乃尔恐一冬不三二朝而已遂步入春  
露坊衝口而成詩何夜無月何家無酒但  
少閑適如吾四人耳

散步閑行不厭頻暖煙門巷越冬温話深不限城頭  
鼓歸晚長敲月下門一枕黑甜饒熟睡兩螯風味夢  
清樽竹宮梅信今年早准備新詩問蠟痕

和曲山題太一宮詩韻

蒼精宮闕五雲高千劫塵緣謝世勞太一旂常玉母  
使真官裘被吉光毛仙家功行何多品人物中和第  
一曹近日蓬壺到清淺獨留春色醉仙桃

蕭爽神庭積翠高東瀛修復堵宮勞法傳四葉光前  
後望重層霄一羽毛粉飾皇圖開治道庇庥廣厦



到吾曹慙懃太一池邊月曾照銀觥醉露桃粉飾皇

見今上時首陳脩國史立臺首等事醉露桃圖謂初

喜雨

秋冬不雨到中春壠麥黃芽起旱塵輸販乘時析踴  
貴賤貧無策救飢民誰知一雨連三日走逐群巫謝  
大鈞愚俗豈知皆帝力年年豐稔太平人

即事言懷

抱病三年白髮翁今年自覺更踈慵硯池敗墨無新  
瀋書冊凝塵養蠹虫時向盤方求服食誰從卜者問  
窮通正同農畝憂春旱三日甘霖洗歲凶

涼夜

氣機開闔貴循常極慘隆炎物返傷大暑遽罹前日



酷萬金難買此宵涼商飈借爽清庭戶白露先秋洗  
肺腸一枕夢歸天外境廣寒宮殿夜蒼蒼

跋御史梁公題祖隱君墓碑後中憲大定  
二十七年進士仕至河南府少尹

當年中憲煥人文景仰脩齊表隱君三尺瑾鐫堪晤  
語一家庭訓儘恭懃詩書有種餘金允簪絃傳芳見  
世勛孝子思親同一致幾回瞻灑太行雲

賈祕監宅蓄大龜來自海南盈尺三尾真  
靈物也觀玩之餘賦詩以詠為提點老友

一槩

神龜來自海中央登薦君家五福堂盈尺要開黃髮  
壽巢蓮不羨綠毛香蒼鱗弁獵垂三尾元氣氤氳



六歲昨日朶願觀不足楮牀長在老人傍

壽韓生弘

待扣鐘邊弟子行當年風度已汪洋  
循循試看青衿子濟濟渾如上  
舍庠將就緝熙從灑掃擊磨蒙垢到  
輝光東脩籍手嗟何有重為韓生壽  
一觴青衿西門塾濟

濟衣冠  
上舍庠

和曲山冬日述懷嚴韻

幾年青瑣列朝班萬里江湖又往還  
浮世舉從愁裏過人生能肯老來閑  
時方多故難前料家任長貧免後艱  
更有行身思寡過未能蘧瑗每慚顏

送參政飛卿時改迂西省

辛卯冬十二月七日

漢庭冠劍擁群雄開濟都輸畫一功  
暫試邊籌



外又分春色入秦中風雲平步無餘謹肝膽疇知有  
至公長使救時公等健老夫何有炬蓮紅

奉和曲山胡桃詩嚴韻

藤藜為菓性甘良今歲收成滿市行褐殼外包金作  
鞞黃衣中裹玉為穰似憐澹泊陪尊俎滿巖芳馨  
肺腸聞說開元全盛日十金一拌喜新嘗

又長瀛傳美法

便非常膏同齒

彼桃根植自羗南遺種携來漢使驂雷斧斫開驚蟄  
卯雪穰翻出合歡蟾華池增潤酥同膩老頰含飴蜜  
比甜想得上林初結實百官分賜露恩沾

餞中丞義甫還闕下

并序

子與中丞義甫同官庶下自後君由維陽



移秦中不肖亦承乏福唐地之相去也萬  
里時之契闊蓋八年于茲壬辰春正月避  
迨衛南尊酒間握手道舊殊歡暢也因話  
及弊居醉經堂珉溪曰今易爲春露矣予  
即曰春露堂中秋澗老君應聲云可對梅  
花軒下柳溪生蓋君游蘇門稱柳溪生提  
憲開封以梅軒自號故云即舉酒囑予曰  
可足爲一詩見贈因輟聯成篇以光行色  
其辭曰

綠波春水淨長亭樽酒相逢話故情春露堂中秋澗  
老梅花軒下柳溪生十年一別渾如昨兩地相望不  
易并三篋補遺蒙 睿眷 寵光浮動 漢公卿



衛南讌集纔終日歷下分携已八年玉樹風神猶夙  
昔彈丸詩句轉清圓傳家有學光先業望隴求書  
憶昔賢從此玉墀冠劍地漢家勲業有貂蟬第一

作肯堂有  
傳先業

和曲山見示十六夜詩

三杯兩醖醉朦朧門巷歸時月色澄人影共三驚傑  
句元宵過五贖殘燈遊觀縱美吾誰與老病相仍子  
不勝昨晚詩來知勿藥樂於相對遠方朋

非隱非商處市闌出門即礙覺行難虛名藉藉知何  
有世事悠悠興易闌化日舒長饒暖新詩吟苦有  
餘寒書生伎倆宜人笑兩束贖章要不刊為曲山欲  
以述日唱

和等作編集成性  
以示來者故云



寄贈總帥便宜汪一壬辰正月二十

前日劍騎過衛幸得一識英表勉贈二章

庶見微懇

城晟袍鎧鳳花紅  
颯爽英姿百戰雄  
歌雅有懷千里  
隔停驂還喜一搏  
全忠傳孝繼來家  
法谷靜川空見  
驗功自古詩書出  
名將將軍今日漢  
膠東

隴西名將相山東  
與別諸侯揔不同  
隴右風塵天一  
柱將壇 恩禮漢元  
戎秦風儘詠車  
輶富魯泮重看  
獻誠功想得朝  
天承讎衍教坊  
金壽縣彩雲中

燈市行樂

人喜時和更上元  
春城風物覺清妍  
罇罍傾倒非吾  
事杖履游觀有樂  
全澹澹陌塵燈散  
後迢迢春箭醉



吟邊新詩不獨書閑適待與清時備管絃

為曲山父病作詩以慰之

曲山隱机一冬餘心事中間合減除委巷莫悲來結  
駟崩緜休詠食無魚木欺脾土宜其養詩梗吟吭可  
暫踈六十坡仙年未老万緣灰冷覓方書

再和慰曲山前韻

一身之外揔為餘應有閑憂合屏除出宰莫悲淹足  
驥研精休効蠹書魚兩孟充腹宜相調一盞和顏未  
可踈休信安心泥禪術內經還是不刊書 皓遺興或

若以遺懷餘習在內經還是緊看書

予拜顯軒墓後七日其孫以脾疾亡復作

詩以哀之



悲風吹野白晝陰吞聲不作短歌吟尚期穉子有餘  
慶少慰先生未了心玉樹凋殘天已老蘭芽助長思  
空深因懷此老含飴語地下相持淚滿襟穉子一作  
委蛻

出列子子孫者  
天地之委蛻也

僮哀詩并序

僮姓李氏小字八齡十有六歲壬辰夏後  
六月廿九日因戲水濱溺死貌渇予時卧  
病不知以數日不來見疑其有異且覺夢  
思恍惚及旬餘窮竟所以乃云已死矣為  
惻然者累日其辭曰

來從汀郡六千里執役家僮二載餘兵死不教承舞  
樂陸沉誰料葬河魚樵蘇晚到虞踈失庭戶長興憶



掃除善遇力備平日事一朝不見意何如

挽摠尹湯侯

井幹臺邊始識君共山山下酌新墳攀巋猶是風雲  
夢分陝仍高牧伯勲翠琰能書無媿筆石麟休認辟  
邪文泉高儘慰承家望又見賢郎迥不群

題珠簾綉序後

七竅生香諫洛姝風流不似紫山胡半床夢冷珠簾  
月用煙中一序情鍾樂籍圖鉅破小山犁舌掛倒翻  
卓氏拍沽壚芳悰苦殫同心賞過斷行雲唱鷓鴣

題香山寺畫卷

送客當年過玉泉醉中遊賞得竒觀一泓湛碧浮僧  
鉢幾葉秋黃打石欄山色空漾金界濕松聲清泛海



波寒吟鞭回首都門道斜日歸時翠滿鞍

過朝歌與苦齋馬上聯句

三十年來老友生論文談舊見懽清時健在已多幸  
白髮相從復此行朔吹號寒欺破帽重陰掃靜喜新  
晴憂先樂後平生事一笑長驅過故城

題府判黃懋卿手卷

簿領當年憲府廳已期公叔與同升為觀臨事多難  
際素有持心近厚祿荷橐儘高蘭省諭判花清映玉  
壺冰漳南未是淹留地變化重看九萬鵬

送舍弟南歸穰下

壬辰十月廿  
日彰德相別

相思渭北常年事遠送漳南恨別心沙暖暫聯鴻鴈  
序霜寒瘦斷鶉鴝音兩鄉健在都能幾千里含情老



更深慰浣此懷知懇切不交消息到浮沉

觀光

化日舒長靜八埏夔龍布滿紫宸班閭闔有喜科  
差少煙火全踈傳舍閑象緯拱環天北極聲明漸及  
海東壘春潭不用弘農寶斗米三錢濟歲艱

壽右平章不忽木

黑頭便插侍中貂溱水春風憶共僚學術自初希  
聖哲羽毛今果見雲霄心存經濟開公道天與精神

本朝

紫禁煙花縈繞裏青松千尺儘難凋

閱清朝玉笋班龍麟誰似相君攀事多簡省經綸  
道在從容奏對間黃閣不知金印重思亭清似玉  
閣鳳池剩有如灑酒細馮瓊杯暈壽顏一作梅花



長醉春  
王鍊顏

劍履光清斗極邊  
秋風庭戶淨吟氈  
北門視草情何密  
東閣觀梅暖更妍  
白髮詞臣從寂寞  
青天鵬背鹵三千  
一樽細瀉新豐酒  
此際於君分合偏

漢相規隨有典刑  
讚書今傍太微星  
甄陶品彙均元化  
業履貂蟬自六經  
養浩以剛鄒孟直  
誠心無愧魯齋銘  
細傾東閣梅花釀  
長對西山未了青

賦王詹丞  
宣賜玉杖

王諱慶端字正甫葉城人

青宮宿衛舊將軍  
家世今誰萬石君  
千騎寵光承

眷願一枝方杖  
表忠勤靜臨春  
桂堂階月暖帶紅

鸞扇影雲若把璠璵比  
良德健於羅結更温文

一作前日

倚毗今有効雲  
臺從此策高勳



同鵬飛遊長春宮

步入方壺別有天  
茫茫雲海道家山  
甘河真遇白伊  
始鐵鎖高垂不可攀  
黑入太陰松桂老  
望空玄圃水  
雲閑臨漪門外  
春風暖將復流紅到世間

張鵬飛治虎骨為鏡插作詩以贈

張侯骨鯁霜稜稜  
削出雄軀瑩且精  
厭猛細將鵝作  
項差有羞與鹿同名  
寢皮食肉真吾事  
理髮繡經入  
小成持贈有懷增老健  
一簪秋氣見初橫

虎腦杯二首

帳竿圍錦稱談兵  
猛腦剗來正可觥  
製就要為元惡  
戒飲餘便覺谷風生  
瑣紋漬血紅猶濕  
酒力增嚴氣  
未平廣會長筵莫輕出  
慮妨俚鬼淚縱橫



犀船螺笋脂粉具老頂刺作元戎觥擗頭無復盜跖  
怒持飲頓覺陰風生鎖紋漬血紅猶濕酒力增嚴氣  
未平鱷呔長筵莫輕出挪揄俵鬼恐潛驚一作更受  
惡却思俵  
鬼恐潛驚

十一月十八日壽宮小集

六祖真人牛教  
授伯祥張按察

飛鵬

十稔相望不易逢一樽誰料此宵同笑談偶得陶元  
亮賓主不分龐德翁竹葉添春冬後綠燭華留喜夜  
深紅鼎邊句就東方白却恐彌明訝不工詩一作笑

贈牛教授伯祥

牛君伯祥以失馬辭見示意甚悽惋雖情  
之所鍾正在我輩然思而不置恐傷天和



而病吾子也故終之以電露之喻

朝看頰頰燕于飛夜聽城烏有暗啼風拉綺絲疑晤  
語鏡翻鷺影夢雙樓屢空曾改安貧樂當饋難志舉  
按齊不見六如亭上客此情斷度不容悽

壽長春張真人

絳闕蓬山不易求春風瑤草夢麟洲未如華表千年  
鶴纔閱人間七十秋道紀有方藏妙用玄談登對動  
宸旒慙慙一炷嬰香供吹滿壺天十二樓登對謂言

上對

送王講師歸終南舊隱

青城仙馭本翩躚自惜繙經老閉關藜杖偶隨雲輶  
出草堂今喜鶴飛還道凝甘壑冲融際詩在終南紫



去去黃塵今古道幾人回首似君開

吾友鵬飛張君壯歲論交十年三遇少聞  
如意多見隱憂燕越相望契闊復爾衰年  
遠別互深相愛之情判案須煩例有三惑  
之誚冰清玉潔餘孰何堪下怨上疑自昔  
如此在李華而未免於吾子以何如若作  
計以處時宜貴和而容衆子其行矣詩以

送之

四任邊除見壯猷空拳搏虎踏三虜得便宜處無再  
往當計會時須遠謀花柳都城終歲好江山南土斲  
時游倚門妻子愁仍破檣燕聲中莫少留

送左丞董君行院金陵



壘壁光寒海徼深未容緩帶昇分臨旌旗動色真餘  
事節制無方是自侵纏索要知今日馭戎機還盡老  
臣心迎仙門外生祠栢親見森森綠滿陰

朝謁柳林行宮二詩并叙

至元癸巳二月四日臣膺惲臣文海儼居  
信朝謁春水行宮於瀘曲之柳林優蒙  
睿眷詔錄年名以聞引進者中丞崔或被  
沐天恩敢綴為唐律二詩以表殊常之  
遇臣惲謹序

漢家

天子獵非熊五柞長楊是近宮萬騎遠臨滄海右  
五人同拜柳林東自憐賤子承恩眷重為斯文惜



至公更擬論思叅政議老臣何有沃 淵衷

千官扈蹕 翠華東 詔許諸生見雪宮商嶺採芝

慚綺季新豐需 命似姚崇名燁彤管猶通籍簡在

儒臣要勸忠步出 禁闈傳少俟長揚高樹動春風

癸巳清明後三日偕益津李士觀登太史

臺

客中何處散幽懷放眼高明恐易裁兼覺形神未全  
老試憑筋力共登臺山河繚繞陪京壯樓觀參差落  
照開曳杖不知雙髀困銅駝巷陌晚歸來

奉和李樂齋登太史臺詩韻

褰茶形骸俱諱老較量筋力共登臺漸忻就日瞻天  
近不憚捫參歷井回步下玉堦驚峻極立殘夕照尚



裴徊銅駝巷陌歸時晚一笑倥倥曳杖來  
靈臺璇象兩巍巍夢寐三年始一窺日挾陽烏翻倒  
影天浮圓蓋入銅儀當時東觀張平子此日吾元郭  
若思羨殺漢儒皆實學幾曾分異限藩籬

和李樂齋馬病詩韻

柳都城約勝遊閉門翻作抱官囚血糊駿足幾無  
眼昧庸工悔悞投策杖恐招徒步請求全翻得蹙  
眉憂自今安驥君須記鍼法從來是把頭

為中丞傅陵公壽

如君富遠圖報恩多半薦賢書義方對

何婉玄素回天力有餘論入事機包細大望  
見舒徐近年默數康時奏儘是汾陽極品除



喜答李六祖病後見憶

韻鄉心兩疊稠竹宮長記半冬留  
橘房嬉戲有真樂鵬背道遙忘  
遠遊清夢偶便旬月寢巖花空抱一  
春秋朝來好得平安報香滿經臺紫氣浮

送吳僧清琬長遊上都

顛骨嶢峩峩犀插腦繙經休作越僧看  
潔蠲心行拋塵累飛跳天星得妙觀  
化日闊浮天竺小秋風蘭若野僧殘  
回頭清磬千門裏曇鉢花鮮照眼寒

挽樊君道錄

每歎玄門道有綱樊君扶翊冠簪裳  
公材絕似張嵩岳術異初非費長房  
樽酒笑談才宿昔玉棺飛墮便蒼茫  
仙遊久厭人間世華表歸來意未量



卷二十一  
答晉卿教授

蒼狗雲衣日易翻  
桂薪珠米住京難  
百司扈送回  
鑿輅一室虛  
潛听冷官老  
境靜思林下  
樂鄉書喜向  
枕中看絳綉  
幔底絃歌樂  
政恐天教柰  
歲寒

挽趙公同簽

不肖憚自壯  
歲辱知頗厚  
意廣才踈竟成  
墮窳日暮懷人  
豈勝慨嘆魂而有知  
庶幾少慰其詩曰

氣鬱元龍漢魏豪  
豈容空見卧床高  
力籌戎務開樞  
府膽落僧齋拜  
節毛陰授有機  
黃石略夢歸何處  
赤松邀傷心此日  
題詩客老淚縱橫  
濕佩刀公使日本  
回相會於  
平陽以本國佩刀見贈詩絃用由  
友事者蓋以公全似漢初異人



詩餞王中丞復任中慶諸路行臺愛仰之  
懷義形于辭知音者無惜同賦

詔行臺自昔無恢恢天細未容踈濱池逐鰲真餘

霜簡收炎見壯圖報政果符銀作驗立朝回看玉

此身雖遠吾民晏肯憚風沙萬里涂銀為驗初

二笏乃 諭日若委付 將來以此銀為驗

過樞東府二首呈王院判仲常

延英殿廡風道傳宮語近軍容自從文武岐分

覺韜鈴勢轉雄盡戟凝香連嫖衛出長楊賦云

赤囊封愼折邊衝卻毅莫詫詩書將谷靜

要駿功

雄見致隆折衝樽俎沃洲袁庭花露重疑深



石犀寒辟軟紅國論動能參兩勢朝堂亦作寧

空歸鞍細嚼輪臺詔兵寢刑清是極功

題峴山白石洞野齋序文後

東北望峴山蒲馬風埃憶往還白石久聞經洞  
碧雲誰似老僧閑夢驚三十年前事詩在推敲月  
安得野齋相約去松風岩壑共躋攀

送王司業嗣能倅衢州

年持節使閩甌端是騎鱸汗漫遊兩浙江山真覺  
畫三衢風土似中州兵餘獨重瘡痍苦政異無逾懦  
謳此去新詩更瀟灑所思多在望濤樓

完顏士慶赴任蜀省來別索詩係金

秋滿長安落葉紛天葩根異獨竒芬氣馥不在新豐



酒志遠先馳蜀棧雲幕府文書無整肅郎官心事足  
忠勤腰間四世千金劍又見清光湛斗文

輔提刑正臣挽詩

并序

臺憲者煩長道而服群醜也昔魯人以泮  
水頌僖公而曰敬慎威儀維民之則載色  
載笑匪怒伊教如提刑輔公有焉又如諸  
生稟繼于邁思樂何啻采芹藻而已不肖  
猥繼公後親覩斯美豈勝歎歎蓋學校乃  
國家之元氣故予特以崇學為言使留心  
於簿書米鹽間者聞先生之風庶幾知所  
自云秋澗王惲謹序

澄清心事見褰帷只道剛稜未盡知霜逐簡華森憲



府力宣風化作邦基廟堂留像瞻遺愛寒藻翻香舞  
類池夢到養源堂上月至今鐘鼓似清時

前年學館拜遺祠此日看君墮淚詩飲食固云飢渴  
易教條能盡後先宜豸霜肅政潛臬軟文藻翻香舞  
類池夢到養源堂上月至今鐘鼓樂清時

李廷珪墨潘世傳能定人神志予病乂思  
若恍惚因假之師孟研汁一龠飲之戲漬  
餘馥賦詩少見無聊賴之緒時癸巳八月

朔日也

龍齋如珪獨擅唐洗心今試秘

滿意濃薰月露香靈府策

文戰非吾事正



送鄧郎任繹州

我客京華識鄧郎，恍如身在  
齋傍。三年載筆同詞  
館，一字論文憶夜牀。老去  
光陰都幾許，別來雲海尚  
相望。玉堂昨夜秋風冷，夢裏  
歸心到汶陽。

秋澗先生大全文集卷二十一



開化圖書館  
 Kaikwa Library



秋澗先生大全文集卷第二十二

誠說堂

三牲致養應爲易揚子怡親志所難滿抱忱誠無少  
慊一杯菽水見貞歡詠歌豈取時人譽溫清思貽後  
嗣看想得歲時稱慶處春風香藹紫庭蘭

史宣慰子明友松亭詩

壯歲英威大樹馮老依松翠養襟靈秋聲幾泛投壺  
唱偃蓋空懷倚杖形華屋丘山驚夢斷玉堂編簡為  
君青千年貞魄棲脩幹不信龍泉閔夜扃

壽張左丞子友甲午正月十六日

箕尾儲精一氣氲仰看風骨秀而神青宮羽翼風雲  
舊黃閣調和鼎鼎新若論採時非易得與同熙載更



誰親一盃重為君侯壽紅藥堦前要好春  
春坊壁月挂瓊枝人物風流映一時四海蒼生欣望  
愜兩宮和氣對時熙西池進讀露珠遇東閣追攀辱  
舊知此日壽君宜有頌載歌箴儆武公詩  
供職詞林已四年今春添壽倍增妍詩如東閣梅花  
細人在春坊壁月圓漢業翼成無跡考遂初亭暖覺  
春先沙堤有語蒼生福好在論思拱御筵  
今歲調元事體新風雲開闔入經綸兩宮受賀安磐  
石萬國歸心有老臣相業儘高麟閣讚醉吟時到野  
亭春五雲深處台星爛長見清光拱北辰

甲午歲正月二十三日右丞何公

麟華旦

謹奉唐律二章

介眉壽



婆娑一畝陰貞姿不受歲寒侵侍謀東閣時情  
協養浩南窓夜氣深閑縱詩懷穿理窟靜觀蟻易見  
天心百觚剩有春風釀重為明時要細斟  
叢臺柱服士如雲又見聰山一氣春帷幕細談天下  
事典刑渾是老成人詩來東閣梅花細歌入民謠漢  
法新健羨武公宜自做太平勲業盡麒麟

過左副賈相公新阡

左副新阡何處尋邠陽東北望喬林連城政美無瑕  
壁萬卷書多遺子金冠劔圖形凌閣重風煙埋恨石  
麟深峴山欲墮豐碑浹桃李公門綠蒲陰

彭澤二賢堂為江州周使君賦

歛裳宵逝無三月待臯鳴琴蒲五年與論行藏元有



異比量心事本同然浴光力取虞淵日示貶忠凝甲  
子編千古新祠祠下月不應獨照二公賢

謂分光於使君也

李清甫分齋

鷄飛不過丈尋間鵬翼雲垂九萬搏每自忖量彘秉  
外就中增損一毫難洗心俠習從多可放眼青天有  
達觀拈取榜齋才隻字此身還有泰山安

送表弟雲卿經歷赴上都先時韓壽院判

仲常詩有通介不隨新進士  
書生之句大為王君稱賞及此行仲常用  
元韻餞贈韓持詩見示亦請予依韻相送

因勉為賡賦

樞庭機務貴謀成調議中間執倚平經事莫深吾弟



慮臨機能盡上官情正煩幕畫孤忠壯肯着車輪  
角生明日馬頭新店路居庸山色照吟觥

秋日宴廉園清露堂并序

右相康公奉

詔分陝七月初一日宴集賢翰林兩院諸  
君留別中齋有詩以記燕衍因繼嚴韻作  
二詩奉

平章相公一粲時坐間聞有後

命故詩中及之

何處新秋樂事嘉相君絲竹宴芳華風憐柳弱婆娑  
舞雨媚蓮嬌次第花照眼東山人未老舉頭西日手  
空遊賓筵醉裏聞佳語喜動金拌五色瓜

領照一作  
高雲錦席



翻涼吹翠蓋  
紅粧簇藕花

朝野歡娛到靖嘉五年經制見金華先聲遠動秦川

樹後命光融紫禁花歸騎不妨沙路晚留中恐為

國人遮暗用司馬端明自慚忝列絲綸地憔悴秋風

一繫瓜

德壽殿玉方池研理宗所御德壽殿為大  
皇後所居殿緝熙講經

殿也  
碧絲歛

玉斲坤形靈四溟丹書猶認壽宮名紛紛落墨騰蛟

霧浙浙秋風拉瑟聲神物不知崑火烈碧絲今對玉

堂御眼中多少興亡事白髮孤臣取愴情當時同僚  
承旨留中

齋學士劉東崖侍讀  
趙方塘皆宋人也

甲午秋七月九日扈山約李君水芝之會



子以事不克往明日例徵詩因繼中齋韻

陪京秋早物華清杖履迎秋出綺城蓮社與吟千葉

白盤餐非為五侯鯖眼中閣老何蒲洒意外浮名任

易更唯有柯山山上月歸心同照石梁橫

飛蓋追隨野興清冷煙疎雨濕層城兩舷踏足空蓮

唱大嚼過門得鼎鯖錦席高雲增爽朗秋風殘暑喜

交更竹西歸晚留餘思詩在夕陽澹處橫

為周紫岩賦冬日牡丹 蘇州人右職出身  
新蘇兩浙行省事

中齋  
索賦

翦翦江風十月霜寒梅時序見花王一技重薦金盤

瑞蒲幄濃薰麝粉香協氣暗扶忠節壯名葩來伴紫

岩芳故園從此恩光爛卷裏題詩半玉堂



再繼前韻贈中齋承旨

先生襟韻氣之清  
開府歸來客  
薊城雅集不知河朔  
飲名談有味德麟  
歸心落日常躑躅  
世事浮雲任變更  
夢到柯山山上月  
流光還愛石梁橫

賀梁參政陞拜左轄

故都喬木百年春  
累葉簪纓得相君  
馬出渥波騰逸氣  
豹藏玄霧見竒文  
十年佩玉何清響  
一見英標勝素聞  
剩說鼎調多至味  
兼收時到野人芹

題奉常李謙甫歸觀詩卷

十載馳書望玉關  
一朝羅拜喜生還  
溫顏孺慕猶親側  
秉燭相看似夢間  
棣萼香凝姜被暖  
故鄉誰羨錦衣班  
鶴鷄庭樹春多少  
車馬西行揔詔頒  
一首句



華四承十餘年阻離珠城喜生景一  
華承餘年阻離珠城喜生景一  
華承餘年阻離珠城喜生景一  
華承餘年阻離珠城喜生景一  
華承餘年阻離珠城喜生景一  
華承餘年阻離珠城喜生景一  
華承餘年阻離珠城喜生景一  
華承餘年阻離珠城喜生景一  
華承餘年阻離珠城喜生景一  
華承餘年阻離珠城喜生景一

賀唐承旨新堂落成

碧鷄華構喜新成  
軒瑣虛明夜白生  
花影入簾詩思  
淑琴聲當戶月華清  
人生孰若安居樂  
樽酒重尋  
雨盟不作老張輪  
與頌玉堂青  
議正煩卿

甲午八月一日赴李揔管蓮塘之會坐中

走筆賦此

斗酒初醺倚畫欄  
藕花紅映万珠盤  
野烟高柳吹衣  
濕碧落銀河照眼寒  
老去自知情味減  
興來思盡故人權  
相逢一笑真難得  
况復君侯禮數寬

諸人酬詠既已復和前韻

垂柳橫橋轉赤欄  
望中清興散愁盤  
玉淵堂迥山光



碧秋水臺高午景寒爛熳不知前日會唱醕當記此  
時歡平生肝膽向人盡不是悲秋強自寬

甲午中秋日宴同簽洪公東第賓僚集賢  
翰林兩院而已將暮雲陰四合既歸月明  
如畫偶賦此詩且記盛筵三首

今年秋夕賞心何然竹堂深間雅歌三院盍簪都下  
少四筵登味海東多休辭皂蓋停車轂盡倒清樽待  
月娥兩袖桂香翻未盡更憐歸路影婆娑

赤囊無騎海無波今歲中秋樂事多為愛願軒吟吳  
逸來陪詞客醉時歌紅雲照眼瞻天近白髮欺人奈  
老何連夜暮歸驚夢異林間金背看陂陀

稍稍英氣秀橫秋此日青雲接燕遊賓府笑談詩禮



帥故家人物鳳麟洲為憐桂影饒清賞  
歸避金吾怯晚留為見願軒慤厚意更將遺  
吳較詩籌

題高和甫侍郎先世圖譜後

故都喬木幾蒼二高氏宗支慶緒長兩世  
簪纓登相府百年忠孝見諸郎解紛晉漢多  
險積歛衽韓劉避耿光十襲室藏防墜佚衛公  
遺物要同芳

送東崖學士總尹建昌軍九月十三日

待詔詞林整十年黃金橫帶列朝班紅雲黼  
袂瞻天屢白晝鄉闈着錦還顏筆謝詩增曠  
達銅陵碧澗夢躋攀殷勤華子崗頭月先借  
清光浣別顏

遊水峪

兩沐山容曉更鮮峪深行入洞中天林間石  
碓傳經



鉢嶺崦雲封種玉田世味酸鹹誰自信人生聲利古  
難全道人歸潔宜諳此抱石歸來煮夜泉

今秋山北迂回鑿偶得新詩記往還臣子要知吾分  
在功名休問走天慳滿軒光寵昼庸道兩袖風煙水  
峪山同見同游又同樂從容恰及一句間

過誨之高兄新昼

高子幽居遠若村北城城下柳葳門寒因霜早收梨  
栗貧喜家安遺子孫閑裏有詩渾湯與客來止酒對  
空樽自慚過訪成踈曠戀戀相看到日昏

為洪同簽書諸公中秋燕集詩卷因題于  
後

詩鏗鑿碧空雲一樣書來更可人落墨空翻



黑清吟真有鴨江春鷄林取重吾何有樞相知音世  
罕倫還笑愛鵝王內史寫經時與羽流親

壽泉平章

兩朝元老漢刑儀宣室深香侍受釐博識不遺三篋  
秘拜公應較十年遲敢從汗簡聯清秩喜為裁詩薦  
壽卮瀚海綠波三百曲歲浮春色上芝眉

壽董承旨

正月十一日

百觚春酒遐年壽十首新詩二品官窮達不為身外  
計功名儘向後來看細圖野隱明歸志靜撫孤松愛  
歲寒此日稱觴宜有頌兩宮恩眷古為難

送縉雲教官伯讓之任浏陽仍和見贈韻

縉雲遙裔以才聞遠任長沙吊楚臣論學拜官甘冷



職過門求益有斯人道傳伊洛真吾事詩到齊梁恐  
後塵領取漢家声教去六經何地不陽春

元貞二年丙申元會日大雪

万室陳庭未是奇千官朝處玉為墀靜看整々斜々  
態不礙踰々濟々儀法部氣嚴催箭舞御炉烟澹  
濕寫旂小臣歸美豐年度不數元和賀兩詩

送省掾李希顏隆興總判

西京人

春水延芳苞從辰笑談鞍馬見情真幾年盡省含香  
掾一日公堂入幕賓政異莫如官事簡心丹回夢帝  
城春古稱四海皆昆弟洒落如君有幾人

題彭壽之慶八十詩軸

竹色宮墻野粉黃百年遺老見張蒼青雲仕宦思



昔白髮光陰在故鄉步健不知鳩杖勁眼明猶烟竹  
書光若從九老徵遺事好着丹青畫室坊

大賢詩三首并序

甲午歲正月廿二日癸巳偕翰林諸君謁  
太傅伯顏公於東城甲第之北堂公姿威  
不見猛簡不失和貞魁傑人也公初至燕  
首詢諸何右轄曰翰林諸老今在者誰及  
是歷問各官壽期今供何職醕禮間頤相

謂曰

朝家所以養諸老者正臣乞言論政而已  
如事會議各頤官守未免或偏若集之同  
僚則議論通一所益良多某曰前世立益



政院者正此意也中丞崔相亦以為然乃  
知公深謀遠至氣量含弘 朝廷之上軍  
國大計心無或不在所謂大臣以道事君  
者也既而公出衆侯門屏間遺純綱來謝  
曰不敢多勞遂退因得大賢詩一首紀其  
披觀之快後二年公府掾張楚持畫像懇  
予哀挽既書鄙辭載惟疇昔情有不能已  
者且念六合雖一相業未展天不憇遺哀  
斯民之不幸也噫因附錄于後

萬馬龍驤宿漠陞朔雲邊雪避旌麾麟遊近藪人歌  
瑞虎在深林氣甚夷解甲齊山降宋日鞠躬趨陞入  
朝時有懷不盡蒼生事空詠皮公七愛詩



使華來自海西邊一日風雲擁將壇仁信有餘收戰  
格旌麾不動下臨安應憐文武匡時切忍對麒麟畫  
像看不獨臨淮開府掾追思勲德淚闌干

軍容機政兩儀刑自有胷中節制兵直道事君忘智  
勇丹心爲國儘忠貞風雲感會千年契笳鼓歸來六  
合清遙想翠華秋彌際  
聖情凝佇聽鼙聲

異菊圖一技十花容色各異未之見也故

賦

枉說重巖細菊班連眉十樣更清妍不辭老圃秋容  
澹要見花神景氣偏越被香濃薰百和柴桑人去已  
千年醉吟不用江州白此日東籬得董仙



百品沅芳見已稀一枝獨秀更堪奇  
秋陽借暖留三徑翠袖分香列十眉  
竹外晚粧明閣院月中青女要新詩  
繁華淩斷長沙夢盡裏淵明又一詩

聞友人買犀帶

聞君饒價買犀躔但爲精神見老年  
論品要勝華袞異垂腰猶欠玉魚懸  
通天即是裴公賜素髮其如白傳顛  
留取百錢休妄費安排開歲置貂蟬

贈潘州朴生子温

踵門來謁樂新知自說容城指授師  
孤鶴遠從華表下六經都向管中窺  
西山掃墓懷私淑東都趨庭儼聖恩  
莫把一簞顏氏樂春風吹作錦囊詩

送總統佛智師南還



釋教總統佛智大師姓積寧氏名沙囉巴  
華言為吉祥慧也西番人祖相嘉屹囉父  
沙囉觀以象胥主譯諸經至師八世矣師  
早侍帝師發思巴受知先朝精詳內  
典又喜儒書樂與吾屬游元貞初選師為  
江淞總統明年率諸山長老入覲獲侍清  
燕啓沃一言煦燠三吳同熙大覺未歸江  
東父老投牒行臺趣師南還將行以贈言  
為榮因賦是詩以送

白足毗耶不易逢鬢絲禪榻偶相同經未震旦三千  
界人在天龍八部中滿送酒船浮坵海細薰香霧供  
南豐江東父老催飛錫要沸潮音與海通



與梁揔判楊少監武子劉揔管叔謙會梁  
都運高舍別墅夜話帳中樂怡也梁君  
索詩因書此以荅雅意元貞三年二月十  
八日也

問字掌思過子雲一樽梁對喜情親清燈夜話逢知  
友喬木蒼烟憶世臣野水添杯無盡藏侯門儲慶有  
餘春五枝休數燕山竇黃閣經綸見秉鈞

挽子敬楊君

終唐州知州子裕母弟

青血陵陀閱夜泉鵲鴿庭樹已蕭然一樽色飲留情  
話五馬長歸是別筵黃壤冷埋林下壁綠波空泛幕  
中蓮息軒未覺風流遠行見吾甦歷試年

送李敬甫之任靖江揔管



海山蟠百十州環桂嶺西南隘漢關吾子有材稱吏  
治土風從古彌時慳老天形劫力開炎德赤子龍蛇雜  
洞壘交致息威民事了震旌歸早慰慈顏

呈高麗世子

霞綺紅潮鴨綠清風姿渾是父王英禮文曲折猶周  
制脂澤溼濡見漢甥衡宇接談今日款中堂  
陪宴嚮來情鳳凰池上應回憶慚愧朱絃一再行

冬日海棠

玉環朝醉綠雲鬢照是幽軒不信冬春色暖私神草  
異丹砂重見海洲紅銀缸侍寢留高照青女憐嬌偽  
動容似與方平慰親老金盤佳品不教空

壽唐承旨母王氏

承旨五六歲授  
孝經論語於母氏



教子堂深暎謝幃，碧梧停鵠發英蕤。燕脂點額猶宮  
樣，懿範齊家備母儀。香裏亦烏花回紫，誥雪封梅信動  
橫枝。百年好在升堂拜，歲入分香入壽卮。

慶王彥舉太夫人九秩之壽

花柳西池點翠妍，婺光曾現竹宮烟。年高賜幣承  
恩重，子孝能忠見母賢。女誠看未形管煥雲，花行墮  
誥寫鮮風流九十人。人間福纔是平頭第一篇。

和樞院王仲常雪詩嚴韻

龍武新軍宿禁墻，鉄関風急走降王。雅歌望絕白  
華使，朔雪春回黑帝祥。四海同風有今日，九天清吹表  
戎行。兩宮和氣春如水，併捲流霞入壽觴。

壽王仲常院判



顴骨清竒類左山紅雲香軟侍  
天顏處心久在外  
沉外着我何妨伯仲間密學潛隨  
宣底轉新詩清  
與化機閑太平有象邊聲靜醉聽長歌入漢關

題節婦寧氏手卷

蘭有幽姿竹有筠秋霜庭戶藹清芬  
誦詩已矢靡非他  
節在禮初無再醮文蟋蟀聲寒思曉織  
著嵩魂黯夢  
孤墳楚王祠下秋原迥消得旌書倚碧雲

贈高麗樂軒李叅政甥朴學士中統初予  
載筆中堂嘗陪先相文會且有唱和今觀  
高標日暮懷人不覺慨歎因賦是詩為贈  
情見乎辭

鴨綠江頭老謫仙醉中吟諷得微言當年翰學推賢



相此日高風得樂軒白雪陽春元寡和翠鸞朱鳳  
看同翻鴨江秀色雞林筆歲封章入紫垣

題保定醫學劉教授慶八十詩卷

八秩光陰積慶多笑看金秋手摩挲前知來事疑  
思邈集驗儒門似子和藥籠功名閑等第醉鄉風月  
飽經過雞川如畫卽山秀好在春風十二窠

和贈高麗鄭學士詩韻

豹管潛窺見異姿雞林詩好動京師恩深自比滄  
洹澗國小方姿節相毗宝瑟聽來多雅唱人生樂處  
是新知蓬山歸到梅花在千樹清香醉拾遺

和雪中鄭朴二學士金司業表訪詩韻

風雪長安撲玉塵詩成勛背欲誰親海東游子興不



淺醉裏微言語更真膜拜尚思瞻國老過門今喜得  
陶賓人生適意無南北宮錦淋漓未厭頻

挽馮廉副壽卿友契

漢署千官列兩曹當時儀物聳清標  
擊囊議事驚孤注霜簡摧姦見六條  
樂府名香金鳳曲揚橋風細月明  
簫雪崖遺恨埋千古大樹風悲日寂  
寂

養志堂詩

為前高西省郎中孫居仁字

幾年臺省列清班  
兼作聖門棄教衰為游刃恢恢政  
務閑順志如詹推致養為親捧檄即承顏  
餘歡方在恩榮際純孝初非口  
舛間開卷諸公足歌詠自今錫  
類滿鄉關

高麗國王謝事詔世子嗣位東還詩以送



禁齋東林得象賢遠持龍節赴真傳  
靜看麗海風雲契更覺天東雨露偏  
萬里寵光隆帝館三韓春色入吟鞭  
百年藩屏敦姻好合有忠精在日邊

秋澗先生大全文集卷第二十二



開化圖書館

Kaishua library



開化圖書館

Kaichua library





開化圖書館

Kaichwa library



開化圖書館

Kaishua library



Blue Cyan Green Yellow Red Magenta White 3/Color

© The Tiffen Company, 2007

TIFFEN Color Control Patches

Centimetres

1 2 3 4 5 6 7 8 9 10 11 12 13 14 15 16 17

Inches



秋澗先生大全文集


六

開館圖書  
Wakana Library



開化圖書

Kaishua Library



**TIFFEN** Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color